

20/04/2003

Dr Mahathir tinjau pembangunan Langkawi

LANGKAWI: Meskipun masih bercuti, Datuk Seri Dr Mahathir Mohamad tetap prihatin dengan tahap kemajuan projek pembangunan utama pelancongan di pulau peranginan ini apabila tiba semalam untuk lawatan peribadi sehari.

Perdana Menteri dan isteri, Datin Seri Dr Siti Hasmah Mohd Ali tiba dari Alor Star dengan pesawat khas di Lapangan Terbang Antarabangsa Langkawi, Padang Matsirat kira-kira jam 10.45 pagi dengan diiringi Menteri Besar, Datuk Seri Syed Razak Syed Zain.

Setiba di sini, Dr Mahathir melawat Galeria Perdana di Kilim untuk meninjau pembinaan dua blok bangunan tambahan bernilai hampir RM24 juta, bagi menempatkan lebih 8,000 cendera hati secara lebih sistematik.

Blok baru yang mula dibina sejak Februari tahun lalu itu akan menempatkan surau, kedai cenderahati, kafetaria dan kemudahan makmal untuk menjalankan kerja pembersihan cenderahati.

Selain itu, sebuah auditorium dengan 150 tempat duduk yang dilengkapi sistem audio juga sedang dalam pembinaan.

Perdana Menteri yang memandu sendiri kenderaan pacuan empat roda kemudian meninjau Jeti Kuah sebelum singgah di pusat penyenggaraan dan membaik pulih kapal mewah dan perahu layar Wavemaster di Tanjung Lembung dan makan tengah hari di atas kapal Obsessions sebelum belayar ke Pantai Kok.

Beliau kemudian singgah di Pantai Kok untuk meninjau projek `Harbour Park Langkawi'. Projek bernilai RM40 juta itu dibangunkan berdasarkan konsep Mediterranean yang antara lain mengandungi marina yang boleh memuatkan 100 kapal layar pada satu-satu masa.

Terdahulu, Dr Mahathir meluangkan masa setengah jam untuk menziarahi kakaknya, Rafeah, 90 di Jalan Pegawai, Alor Star.